

Peguam Negara digesa perjas tuntutan kerugian peniaga semasa Bersih 2.0
Utusan Online
30 April, 2012

KUALA LUMPUR 29 April - Pertubuhan Ikatan Usahawan Kecil dan Sederhana Malaysia (Ikhlas) hari ini menggesa Pejabat Peguam Negara memberi penjelasan berhubung permohonan pengesahan laporan tuntutan kerugian Bersih 2.0 yang diserahkan sejak tahun lalu.

Laporan setebal 365 muka surat itu adalah tuntutan kerugian sebanyak RM817,205 daripada 317 peniaga yang membuat laporan polis ekoran perhimpunan tersebut.

Presidennya, Mohd. Ridzuan Abdullah berkata, pihaknya menggesa maklum balas segera supaya tindakan undang-undang dapat diambil terhadap penganjur atau pihak bertanggungjawab sehingga menyebabkan peniaga diarahkan tutup kedai tahun lalu.

"Apa yang mengecewakan, sehingga kini Peguam Negara masih tidak memberi sebarang maklum balas. Oleh kerana tiada tindakan undang-undang, kini Bersih 3.0 wujud dan semakin ganas sehingga meninggalkan impak kepada banyak pihak termasuk peniaga," katanya pada sidang akhbar di sini hari ini.

Beliau berkata, pihaknya mencadangkan agar kerajaan memberi rebat sewa, elektrik dan air terhadap peniaga-peniaga yang menanggung kerugian akibat perhimpunan tersebut bagi membantu meringankan beban kos kerugian yang ditanggung.

"Bayangkan jika peniaga boleh dapat RM200 sehari tetapi disebabkan perhimpunan ini, perniagaan tidak beroperasi, berapa banyak jumlah kerugian ditanggung dan siapa yang mahu bantu menanggung kos tersebut!

"Justeru, Ikhlas mahu peniaga-peniaga tampil kerana pihaknya sekali lagi akan mengumpul semua maklumat dan kerugian pada Bersih 3.0 sebelum membuat laporan polis dalam masa terdekat," jelasnya.

Dalam pada itu, Mohd. Ridzuan berpendapat, kerajaan dan Kementerian Dalam Negeri perlu bertegas dalam perkara itu agar ia tidak berulang pada masa hadapan.

"Kejadian tahun lalu dan Bersih kali ini perlu dijadikan pengajaran dan berharap semua pihak belajar daripada kesilapan.

"Di mana bersihnya jika peserta semakin kurang ajar dan berani mencabar undang-undang. Kerajaan kena tegas kerana kami bimbang Bersih 4.0 pula wujud dan bertindak lebih keterlaluan," katanya.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2012&dt=0430&pub=Utusan_Malaysia&sec=Dalam_Negeri&pg=dn_12.htm